

IN FUNERE JOSEPHI.

LUSITANORUM, ET ALGARBIORUM
REGIS FIDELISSIMI
ORATIO

ROMÆ HABITA CORAM SACRO EE. AC RR.
CARDINALIUM COLLEGIO
IN REGALI ECCLESIA LUSITANORUM
DIVI ANTONII

AB ATHANASIO CAVALLI
IN GREGORIANA UNIVERSITATE COLLEGII ROMANI,
PHYSICÆ EXPERIMENTALIS PROFESSORE.



ROMÆ MDCCLXXVII.

EX TYPOGRAPHIA MARCI PALEARINI
SUPERIORUM FACULTATE.



UM certum , exploratumque
 sit , experientia , & Religio-
 ne magistra , EMINENTISSIMI ,
 ac REVERENDISSIMI PATRES ,
 omnes homines ex Naturæ lege Mortis im-
 perio obnoxios esse , Mortemque ipsam Re-
 ges , pauperesque æquis proterere pedibus ;
 Cum autem fato cedunt præclari illi viri , qui
 maximis rebus bene , feliciterque pro Re-
 publica gestis , ingentem sibi laudem pepere-
 runt , non modo numquam extenuatur eo-
 rum gloria , aut nomen oblivione deletur ,

(IV)

sed vitam ipsam etiam vivere videntur sempiternam, donec exiturus est Virtuti honor, & decus. Docent id quidem luculentissime pervetusta Romæ monumenta, magnifici arcus, & Tempia ipsa veneranda, ac plena undique majestatis, quorum rudera, quicumque optimas artes probe callet, adhuc etiam suspicit, atque miratur.

Quæ cum ita sint, færales, tetraque mortis imagines, quæ circumvolitantes indicitis JOSEPHUM I. Lusitaniæ, & Algarbiorum Regem Fidelissimum, post septimum & vigesimum Regni annum, inter bonorum, omniumque suorum lacrimas vita functum, procul, procul hinc faceßite. Tuque Sacer Purpuratorum Patrum Senatus, qui Religione circumseptus, ac Majestate, supremas funeris exequias Eidem persolvis; Vosque sacrorum Ministri, qui mœsti ac atrati expiationis hostias, propitiationis sacri-

crificia , precesque placabiles , ejulantes offeritis , flebilium abstinete quærelarum , ac Religionis parumpparcite parentalibus .

Egregia JOSEPHI I. optimi Regis edita facinora , quæ omnium sermone celebrantur , & monumentis jam commendantur sempiternis , luctum minime quidem , non gemitus a Vobis expostulant . Quid ergo ? Hoc in Templo , Deo Veritatis sacro , fieri ne unquam poterit , ut mendacii artibus inserviens , vel assentationis placita sequutus , ethnicas Romanorum apotheoses instaurem ? Absit id quidem , AA ; Licet enim assentatio , fatale illud blandimentum , dulcis Regnorum perniciēs , Veritatisque occulta insidiatrix , viventibus semper Proceribus turpiter famuletur ; Cum tamen diem claudunt extremum , illorum haud ipsa sequitur funus , nec circa sepulcra sedet , sed una Veritas tunc triumphat , cique inhæret

(VI)

ret Posteritatis judicium , quo ad severam , ac sæpe inclementiorem trutinam Principum opera revocantur .

Cum ergo JOSEPHUS omnia ad bene moriendum de hominum genere , firmo quodam animi proposito , constantique voluntate contulerit , ac tanta insuper erga subditos clementia diuturni imperii annos exegerit , ut sane omnes cesserint Regni , & Societatis commodo , ac felicitati ; Sperandum , jure censeo , ut quemadmodum Rex Propheta , omnia sua in supremi Numinis misericordia statuebat , cum ab ipso patratorum Religionis operum , & suæ mansuetudinis recordaretur , dicens *Memento Domine David, & omnis mansuetudinis ejus* (Pf. 132.) ; Sic vehemens desiderium , quo ardebat , & opus diuturnum , quod præstitit JOSEPHUS , pro bene , feliciterque Republica gubernanda , illudque insuper summa semper clementia ,

(VII)

tia , morum integritate , ac pietate comitatum , Ipsum quidem Deo carum citra dubium omne præstiterit .


Qua de re , si interitum Ejus tristes , lugentesque omnes , ut concelebremus hic convenimus , consolatione tamen dolorem leniendum arbitror , si oculos potissimum convertamus ad maxima illa , & numquam delenda gloriæ , atque humanitatis monumenta , quæ in Reipublicæ utilitatem reliquit ; si nobiscum reputemus , ex tot , tantisque facinoribus egregie , sancteque gestis , jam a Deo O. M. Misericordiarum Parente , quod ipsi debebatur præmium retulisse ; Leniri quidem etiam fas est ex eo , quod adhuc Ipse vivat in sua Filia MARIA FRANCISCA pientissima Muliere , quam omni virtutum genere , & eximiis præceptorum exemplis , qualia decent Lusitani Imperii Hæredem , instituendam quam diligentissime

me

(VIII)

me curavit, & in qua Eundem, licet absentem, ita contemplamur animo, tamquam si adesset. Vivit etiam in PETRO Fratre MARIAE Sponso, religiosissimo Viro, & Regni Socio præstantissimo, a quo etiam Ipsius desiderium quammaxime temperari, ac consolari experimur. A lacrimis ergo temperandum, dum in conspectu vestro, EE.PP., Sapientissimi AA, quotquot adestis, brevi oratione complectar, licet imperitus Orator, quæ fusiori, elegantiorique calamo pertractanda exponendaque fuissent, illustriora scilicet facinora JOSEPHI I. Lusitanorum, & Algarbiorum Regis Fidelissimi.





ETSI Regis ambitio excite-
tur quandoque, & commo-
veatur ad laurea bellorum
serta captanda, cum ani-
mus a blandiente quodam-
modo cupiditate comparandi sibi nomen
Domitoris Urbium, Populorumque inflam-
matur, ac impellitur; Nemo tamen nega-
bit tunc solum eandem probari aliqua ra-
tione posse, cum Regnorum, & Majesta-
tis jura, aut pro Reipublicæ bono, aut pro
Religionis gloria tuenda sunt, licet semper
dolendum summopere sit, teterrimum hu-

jusmodi opus, haud perfici posse, quin & ejus rectitudo, & moderatio, humano sanguine inquinetur.

Felix propterea Populorum Imperator, & Rector habendus ille est, qui noxium putans bellum gerere, eo solum intendit animum, ut quæ Religionis, & Regiæ Majestatis sunt, in tuto ponat, & eos, quos subditos habet, ab externis hostibus, & aggressoribus immunes faciat, tum ea in pace, ac tranquillitate ipsos conservet, qua internum, externumque commercium efflorescat, publicæ, & privatæ augeantur opes, & nova accrescant Populis incitamenta gloriæ, quâ summa quæque attingere, & perpetuam, undequaque prosperitatem comparare conentur.

Cum ergo JOSEPHUS, ditissimum, florentissimumque Lusitanorum Regnum, jure hæreditario assequutus, nihil splendidius

(XI)

dius habuerit a JOANNE V. Patre , magnifico plane Principe , ac Religione maximo , tum a MARIANNA , Austriacæ , nobilissimæ Gentis , piissima Matre Regina , quam exemplum ad maxima quæque bona peragenda pro egregia , ac strenua Lusitanorum Natione , nihilque pro optimis arreptis institutionibus magis cordi , magisque in deliciis Illi fuerit , quam bonum & velle , & facere , quis dubitabit eum beatum , ac felicissimum Regem habendum esse ?

Revocate animo , si vultis , quicumque Eum paullo familiarius cognovistis , compositam illam in tanta dignitate , facilemque naturam , judicia in rem quamlibet prudentissima , rectum decernendi consilium ; Reputate mentibus vestris perpetuam illam verborum , vitæque continentiam , flagrans ad omnia pietatis opera studium , sollicitam christianæ institutionis curam , effusam

(XII)

in egenos , ac miseros benignitatem , totam denique illam optimæ indolis rationem , quæ ubique admirationem , & benevolentiam commovebat ; atque Ipsum prorsus quidem ad optimi Regis normam compositum jure prædicabitis .

Et requidem vera hisce exornatus virtutibus cum primum amplissimi Regni , quod per quatuor Orbis partes extenditur , suscepit habenas , de pace , quam Pater curaverat , in tota Ditione firmanda cum suis finitimis egit , & mirifico Religionis studio incensus , novos Episcopatus , quasi totidem firmissimas arces , ad catholicæ fidei tutelam , ac munimentum erexit . Inde paternis circumspiciens oculis Lusitanas res : Gens inclyta (dicere quodammodo visus est) , quæ Europæ nomen , & Religionem tanta cum gloria apud remotissimas , barbarasque Nationes protulit , quæ nulli par-

cens

(XIII)

cens labori, periculo nulli, novas detexit in Orbe regiones, quamque ob res præclare gestas terra, marique, omnes semper magni fecerunt, languori nunc, socordiae, desidiaque se dabit? Hoc Deus avertat. Fiat Lusitanus se ipso major, præeatque Posteritati exemplo, ostendens quid, quantumque Rex in subditorum animos ingerere possit. Si enim Petrus Russiarum, & Ludovicus Galliarum Reges, mores, & animos suorum corrigere in melius potuerunt, ut novum efficerent quodammodo Populum; Eccur eos æmulari non potero, Lusitanos Ipse etiam ad primum virtutis, & gloriæ decus strenue revocans? Hæc secum ipse cum reputat, divino, & novo quodam veluti concitatus impulsu, nulli sumptui, nulli studio parcens, magnum adgreditur opus.

Cum igitur commercii ope, ac præsidio divitiæ affluant Populis, omnes proinde

(XIV)

de intendit nervos, ut idem propagaretur, ac justis legibus administraretur. Quare Negotiatorum Societates instituit, Parahensem scilicet, & Maranoniam, Portucalensem, Pernambucanam, atque Piscariam in Algarbiis; Portoria imminuit, Collegium præfecit Negotiantium, cui publicam addidit scholam pro instruendis in mercatura adolescentibus, tum ut ipsa in honore esset variis ingenuitatis insignibus, amplissimisque privilegiis Mercatorum ordinem honestavit. Optimis, opportunisque legibus latis de eradicandis cistaganis vinetis, atque de colendis transtaganis latifundiis, mire agriculturam, ac rem frumentariam promovit, plurimosque ad laborem, & quæstum adduxit homines, quos antea socordes, atque miserimos ægre conspiciebat. Ipsas perfecit artes, industriam, solertiamque Civium fovit; Officinas siquidem aperuit bombycino-
rum,

rum , lanificiorum , lineorum , leporinorum , vitreorum , testaceorum , ferramentorum , publicaue gymnasia pro Sculptura , Architectura , & Plastica , ut Lusitania facta sit artium domicilium , & rerum omnium emporium , ac totum illud lucrum , quod emanat ex commercio Regnorum suorum , tum ex eo , quod in Europa , in Asia , in Africa , & in America peragitur , amotis etiam exterorum operibus , in Lusitanorum commodum prorsus cedat .

Quoniam autem venales horum res praeque ad transmarinas deferuntur oras , & ex illis plurimae adducuntur ; Ecquis non videt , quantum intersit , ut navigatio omnibus promoveatur modis , ne hostilibus aggressionibus vel turbetur , vel minuatur commercium ? Apposite igitur JOSEPHUS Classẽ comparat , quantam Superiores Reges numquam conceperant ; onerariis ad
quæ-

(XVI)

quæstum navibus liberum commeatum , quavis anni tempestate esse jubet , percussoque foedere cum Marochianis , Mare a Prædonibus liberum reddit . Oh fausta benefici Regis primordia ! Tuum , Lusitania , nunc est Ejus suffragari votis , & obtemperare mandatis , ut germinet , fructusque pinguiore ferat virtutis illud semen , quod tuis a Majoribus recepisti .

Norunt omnes artem militarem illam evertere Societatem , quam firmare , vel custodire intendit . At cum ex hominum pravitae facta sit quodammodo necessaria , validius nunc illi adscribitur totius politici systematis fulcimentum : Qua de re fortissimus , ac providentissimus Rex , ut Majestatis , & Civium suorum jura in tuto poneret contra Aggressores quoscumque , atque ut bellum parando pacem firmaret , multiplicato insuper Legionum numero , præcepta
de

(XVII)

de re , ac disciplina militari conscribenda jubet a Lippenfi Comite , militari gloria clarissimo , eaque probata , & publici juris facta ab omnibus observari in posterum præcipit ; Studium rei tormentariæ restituit , ærariam officinam pro omni armorum genere amplificat , arces propugnaculis munit , & militibus , quibus auget stipendium , campestres , ac quotidianas exercitationes decernens , effrænem eorum cohibet libertatem .

At Foro , & Naturæ juribus etiam prospicit JOSEPHUS . Quare legibus immortalibus latis , si quæ fraus irrepsérat in forum , vel si quid contrarium inoleverat optimis Civium moribus , correxit , sustulit , emendavit ; Repetundarum reos , quos novit , punivit ; Neminem Magistratu fungi passus est , nisi integris moribus , & bona commendaretur fama ; Luxum , quo Cives abrepti , corruptique in malam rem dilabun-

(XVIII)

buntur , compressit , exfulavit ; Et quod maxime humanitati carum , dulcissimumque dictu est , omnique prædicatione , & sempiternis celebrandum præconiis , Indos , & Æthiopes servitute exemit , licet fræmens contra mussitaret avaritia , ac dira Negotiatorum crudelitas . Per hanc quidem sanctissimam legem prima ab ipso restituta sunt jura humanæ turpiter oppressæ Naturæ , quæ nonnisi liberos cunctos omnino homines fecit , simulque debitum Religioni decus restitutum , quæ fraternam charitatem , per quam omnes æquales fiunt , perpetuo præcipit . Ast vero cum non tam periti Medici sit ingruentes morbos depellere , quam ne accedant præcavere , eos insuper in posterum omnibus Lusitanorum Civium jurebus gaudere voluit . Hinc omnia illa abstulit mala , quæ jure inferri ab iis poterant , ut sese a diris eriperent vinculis , nec amplius

(XIX)

plius illa existerent exitia , quæ & a læsa Natura , & a justa desperatione expectentur . Ferra nimirum , ac venena compescuit , quorum viribus victimæ plurimæ , eorum adigente furore , mactabantur ; hisque omnibus Religio , & Humanitas pene triumphans , exultansque successit .

Oh utinam Reges omnes , Proceres , atque Populi , quibus summum imperium concreditum est , hac ætate præsertim , quæ Philosophica dici gloriatur , irritum facerent , & abrogarent falsum , & absurdum illud imperii jus , quo servitutis jugum , vel sancitur , vel confirmatur . Quanto major foret liberorum Civium , Christianorumque fidelium numerus , qui lubentes omnino industriam , operam , & laborem impenderent !

Nec tamen illud omne , quod JOSEPHUS in Reipublicæ bonum perfecit , in hoc dumtaxat versatur : Majora , utique
c 2 sunt,

sunt , ac durabiliora , quin & utiliora . Pro informandis enim subditis ad humanitatem , & civilem vitam , humaniorum litterarum publicos Professores supra octingentos per totam Lusitaniam , & Colónias transmarinas ablegavit . Collegium nobilium Adolescentum instituit . Conimbricensem restauravit Academiam , atque Olysiponensem , quibus optimas , & consilio plenissimas studiorum tradidit rationes , illasque omni instrumentorum genere , ac Pinacotheca ornavit , atque locupletavit , ut facta sint veluti propugnacula firmissima duo erroribus inaccessa , & formidabilia , ubi observationibus , experimentis , mathesi , meditationibus , exercitationibus utiliora quotidie deteguntur naturæ arcana , tum Critice , quæ a prudentia temperatur , magistra , superstitionis nubes depelluntur , quæ Doctiorum etiam mentibus caliginem offundebant , nec quid ,
vel

vel solidioris momenti veneranda antiquitas complectebatur, vel ab historia, vel a literatura tradebatur, inspicere sinebant. Hinc caliginosis profligatis temporum tenebris, Scholasticorum depulsis ambagibus, ac turpibus omnibus fugatis erroribus, quos ignorantia, sacros quodammodo præstiterat, rationalius factum cernimus Populorum in Fidem, ac Religionem obsequium, & Veritatis studium magis, magisque invalescens.

Nec sane quidquam hinc metuendum habet sancta, purissimaque Religio, ut meticulosi blaterant nonnulli. Fundata enim cum illa sit supra Veritatem ab Eo, qui Veritas ipsa est, & ad Veritatem hominibus viam, cum scientia sternat, sanctissima illius, magis inclarescunt dogmata, ac intellectu facilia redduntur, quo tutius infringi adversariorum tela insuper possint. Quid præterea? Religio in Solio sedet una
cum

(XXII)

cum JOSEPHO, qui nimirum nec privatim eam intermisit umquam, quin publice ad exemplum splendide coluit, ut præsto semper in omnibus Illi fuerit, eamque insuper adesse voluerit, tamquam ornamentum præcipuum Magistratibus omnibus, ac Præceptoribus, qui ut aliis recte præessent, & ut alios probe docerent, non eligebantur alii, nisi quorum explorata omnino foret, & morum integritas, & fidei puritas. Portio enim hæreditatis hæc est, quam suis a Parentibus gloriosissimis accepit, quamque ad Regalem Sobolem transmisit.

Felix ergo Gens illa, apud quam litterarum commoda, & ornamenta in propatulo sunt, nec mystice tantum in nonnullorum penetralibus dignoscuntur, sed attinguntur ab omnibus, quos bene vivere, & bene sentire æquum est!

Post ergo tot maxima, atque utillima
faci-

(XXIII)

facinora , quæ Lusitanæ Genti pacem , atque perennem felicitatem comparabant ; En horrendum insurgit Naturæ phœnomenon , quod omnia turbat , invertit , pessumdat . Cœlum obnubilatur , caligine obducitur , tota inde concutitur terra , & Olyspo , Urbs illa magna divitiis Americæ , Asiæ , & Africæ cumulata , quæ septem super colles , Tagi sedebat Regina , commovetur , dilabitur , & pene deformatur . Hinc mæror , anhelitus , pavor , ac terror omnes invadit , dum ignis ita miserandas reliquias corrumpit , atque confumit , ut superba , & plena Populi Civitas , tunc summa in calamitate versaretur . Nec Tempia ipsa , a tanto exitio immunia sunt , ut Sacerdotes , ubi divinam exorent opem , vel sacra peragant , loco deficient . Omnia tandem permixta cum essent , atque confusa , Cives exleges fiunt . Quilibet pavens , ac tremens asylum sub dio quærit , & cla-

(XXIV)

clamoribus omnia implens , de illata sibi vel suis calamitate conqueritur . Oh diem vere teterrimum , ac nocte qualibet obscuriori deteriore , in quo elementa omnia invicem pugnancia Naturam ipsam veluti in primum Chaos abeuntem portendere videbantur .

In tanta autem Lusitanorum omnium trepidatione , atque tumultu , JOSEPHUS inter Principes providentissimus , amantissimus inter Patres , Nautæ instar optimi , qui navem fluctibus jactatam , ac pene fatiscentem in maxima maris procella conspiciens , eam tamen feliciter in portum perducit , & omne , quod tanto infortunio , tantæque calamitati remedium afferri potest , sedulo perquirat , & impigre adhibet , ut statim in integrum , quammaxime fieri potuit , & civilia , & politica , & religiosa omnia restituta fuerint . Hinc Sacerdotes ad Sacra peragenda redeunt , Virgines Deo dicatæ iterum

rum sacra ingrediuntur Cœnobia, iterum suprema Prætoria, supremasque Curias repetunt Magistratus omnes, ut suo fungantur munere, & Civibus iterum propria asserant jura, tum Justitia, Abundantia, Pax, & Securitas, suas in Urbe Sedes nanciscantur. Hinc Urbs ipsa, denuo excitatur elegantior, atque splendidior, extructis, ingenti sumptu, atque incredibili plane cura Foris, Domibus, Collegiis, Bibliothecis, Xenodochiis, Licæis, Arcubus, Aquæductibus, Scalariis, Pharis, tum constratis iterum viis, erectis Obeliscis, Statuis collocatis, excitatisque Pontibus, & Molitionibus aliis, quibus Romana magnificentia instaurata videatur, & JOSEPHUS communi omnium plausu, ac voce vere Magnanimus, Paterque Patriæ vocari promeruerit.

At proh Deum immortalem? Quam inscrutabilia sunt judicia tua! Quantaque in-

(X X V I)

constantia cor hominis laborat ! Quis credat , A ? Dum JOSEPHUS alienis calamitatibus ita commovebatur , ut eas aspiceret tamquam suas ; Dum totus est in eo , ut Lusitana Ditio , & Olysipto magnificentior exurgat , ut comparet Civibus aptiores ades , ut ipsis undique prospiciat , & Annonæ ubertate fortunet ; Dum sapientissimis legibus artes omnes , scientias , publicam securitatem , felicitatemque asserit , (quamquam Ipse animo felix , beatusque sit ob maxima agitata , & peracta in aliorum utilitatem facinora) in tam dirum , ac nefandum discrimen adducitur , ut ea , quam aliis Ipse largitur , securitate deficiat , & clementiam , ac pietatem , qua unice commendabatur in justitiam , ac vindictam commutare compellatur .

Vix autem eidem , pro dignitate , satisfactum fuit , semper Clementia , omnes Ipsius animi motus comitata est , & Ejus Cordi ,

(XXVII)

di, tamquam pristinae Sedi restituta. Quare si quis unquam Princeps hac præstanter donatus est virtute Imperantibus quidem omnino necessaria, JOSEPHUS certe fuit, qui non tantum illius prætulit speciem, sed vere, & integre ipsam professus est. Natura enim ipsa suavitatem quamdam induxerat ori ejus, quæ aspicientes statim alliceret, & ad benevolentiam conciliaret. Quid vero, si se tibi daret, si alloqueretur, si opem suam reciperet? Tum sane in ipso vultu intimæ cordis affectiones apparebant, ut si nihil daret, nisi verba, tamen verba ipsa ex animo profecta minime tecto, pro factis acciperentur. Clemens ergo ita fuit, ut jure meritoque de Illo prædicemus, quod de Julio Cæsare olim dicebatur, ita nempe clementem fuisse, ut poenitere debuerit. Absit tamen, ut quis proinde inordinatæ pietatis notam Fidelissimo Regi inurendam putet. Equi-

(XXVIII)

dem scio maximum hinc detrimentum pro-
manare in Rempublicam , ob justitiæ , quem
generat contemptum . Ast cum Clementia
rationabilis est , nihil certe nobilius , nihil
utilius esse Reipublicæ potest , ipso Spiritu S.
suffragante . *Misericordia , & Veritas custo-
diunt Regem , & roboratur clementia thronus
ejus .* (Prov. 20.) .

Et sane tanta in JOSEPHO fuit , ut qui
ipsam non suspiciat , non magnam prædicet ,
non justam , rectamque decernat , injurius sit
Veritati , & cordi Principis , quod ipsa Co-
mitas , & Humanitas efformaverat . Videte ,
quæso , Auditores , an fucum vobis faciam ,
vel potius rem referam luculentissimo exem-
plo comprobata . Recolite memoria quæ
post Ejus luctuosum interitum , primæ ad nos
voces afflarunt . Constitutus in summo vi-
tæ discrimine , ægre omnino fert tantorum
vincula , & carceres , jamque ipsis veniam om-
nino

(X X I X)

nino largiendam indicit , & Regiæ Filiæ , jamjam Principatum captaturæ hujusmodi indulgentiæ munus , gratum omnino demandat . Tum insuper monet , ac rogat , ut firmam fervet , stabilemque concordiam Sacerdotium inter , & Imperium , charitatem erga subditos gerat ; Templumque tandem , quod voti causâ in Deiparæ honorem inchoaverat , suæ ab ipsâ acceptæ incolumitatis testem , perficiendum omnino committit .

Ah si clementissimus , & religiosissimus Rex omnem ætatem in Reipublicæ bonum consumpsit ; Si animam habebat , ut Tertuliani verbis utar , naturaliter christianam , necessitate coactum cuncta , quæ offendiculo nonnullis fuerunt , vel quæ displicere potuerunt imperasse , dicendum est .

Utique , A , hæc ipsa , enim , declaravit in extremo illo vitæ puncto , in quo homo , etsi Rex , nil amplius habet , quod animo re-

condat . Quare jam morientem justissimum Regem , ac clementissimum , intuemini .

Mortis adventantis , terrificam speciem impavide respicit ; Auxilia , & Religionis solatia , primus ipse requirit ; Attentissime annos vitæ suæ scrutatur , & examinat ; & peccata , si quæ habet Principis , ab hominis peccatis , quæ Naturæ imbecillitate patrantur , sedulo secernens , indutus habitu Fidei , & Charitatis , piaculari expiatione delet , suosque facit gemitus pœnitentis Regis . *Et quoniam Rex sperat in Domino , & in Misericordia Altissimi non commovebitur* (Pf. 20.) ; Tandem morbi vi oppressus , at fortitudinis , & Religionis plenus , qualem decet christianum militem , & Regem , juxta exemplar Augustæ Gentis suæ , in christianæ Pacis sinu , diem claudit extremum . Quantum igitur ad humana , ac divina præsidium , unius hominis morte amissimus !

Si

(XXXI)

Si ergo historia maximarum rerum gestarum , ita nos sæpe percellit , ut gravi afficiamur dolore , cum Heroes , quos immortales esse decebat , vita functos legimus ; Ecquis , pro tot , tantisque gestis a JOSEPHO I. in Lusitanam Gentem , & universam Rempublicam , Eum , nunc morte deletum , non lamentetur , & doleat ? Ecquis dein , humi provolutus , ad Regem Regum , qui aufert vitam Principum , ad Deum terribilem Regibus terræ , qui & in Angelis suis invenit pravitatem , precibus , & hostiis , non illum exorabit ut requiem , pacem , & refrigerium largiatur animæ pientissimæ JOSEPHI I. Lusitanorum Regis Fidelissimi ?

Accedat sane , firma , quilibet , spe nixus , ea nempe , quæ piis dormientibus convenit , quæque etiam JOSEPHO REGE FIDELISSIMO dignissima est . Christianas enim virtutes , quibus Ipse excelluit , Omnipotentis

tis Dei , Misericordia accedente , Cœlitum
 Choro adscripsisse Ipsum non dubitamus .
 Quare exfulet luctus , recedant lacrimæ ,
 absint querelæ . Præter spem optimam , quam
 habere nos æquum est de religiosissimo Re-
 ge , accedit MARIA FRANCISCA , Ejus
 Filia piissima , quæ Ipfi succedit Regina ,
 quæ non tam in Regnum , quam in pater-
 nas virtutes , statim succedere visa est . Orta
 Ipsa ex Matre CAROLI Borbonici , Hispa-
 niarum Regis gloriosissimi Sorore , quot non
 præstat , christianis , ac plane etiam regiis
 virtutibus , quas tam mirifice Borbonides
 omnes , perpetuo novimus exornare ? Spon-
 sa etiam , cum sit integerrimi , ac religiosis-
 simi PETRI , JOSEPHI nostri Fratris ; Quis
 non Pietatem , Religionem , Prudentiam ,
 atque Justitiam , veluti una confociatas de-
 miretur ? Postquam igitur pro anima JO-
 SEPHI Optimi Regis , sacris , pro more
 per-

(XXXIII)

persolutis , Deum rogavimus , enixe etiam ,
omnibusque precibus Illum obsecrabimus ,
ut diutius pro Ecclesiæ bono , ac Lusitani
Regni faustitate , foveat , atque conservet
MARIAM FRANCISCAM Lusita-
norum , Algarbiorumque Reginam Fidelis-
simam , PETRUM Regem , Ejus Spon-
sum , totamque Regalem Sobolem , quod
unum nunc exoptandum , & in posterum
quoque nunquam intermissis votis expe-
tendum .



I M P R I M A T U R,

Si videbitur Rmō Patri Sacri Palatii Apostolici Magistro.

*Franciscus Ant. Marcucci Episc. Montis Alti,
ac Vicefg.*

I M P R I M A T U R,

Fr. Th. Aug. Ricchini Ord. Prædic. Sac. Pal. Apost. Magister.

IF -

94-E

A 1 5

